



5 minuti di lettura

Quand at crëd uramäi d'avì guadagnä 'l diritt ad ciapä fiä dopa una giurnä 'd lavor c'la t'ha imbacüchì e che vérs la fein sà at'imaginäva longh e dastes in sla tumana cun la pansa piina e un bell libar in man, ariva la masä : la riünion ad cundumini, straurdinäria anca sina.

Vacca al füm m'la s'éra propi dasmingä!

Al culegameint di neuroni l'é svèlt abota : gh'è la riünion e mé muier la g'ha la freva. L'am tucca, an gh'é gn'in da fä. Teimp des minüd söna 'l mé visein ad cà, bisogna trä su una strategia par iess d'acordi cusa vutä e quäl pöl iess al limit pr'un culp da stät.

As sintiva in dal palassi un sérta euforia, l'äria l'era propi diversa parché gh'ì da savì che in dua stò 'd cà ien tütt famili ad pensiunä, föra che noi e un'ätra a pianterein. Sum chi ca sbasà l'etä media.

La riünion l'é prevista a un quärt il növ a dü minüd da strä ma sà a ott e un quärt gh'era un gasagä ad gint in si scäl e port c'as variva e saräva, la vuläda par ciapä post in prima fila. A cul pont che al mé visein al g'ha un'idea da Napoleon : sà disat s'andasma in machina ? Va bein, e sum partì, a ott e veint, in machina, par fä quattarseint metar, però sum 'rivä par prim. Di man in man ien 'rivä tütt, ma propia tütt, al cundumini al s'era trasferì in sal märciapé in mira all'ufisi dl'aministratur, in anticip d'un quärt d'ura. Lemò ho realisä che cul ca par mé l'era una luiäda dal nümer vöi par tütt i'ätar l'era una gran festa, föra ca par l'ätar "giuvnott", cmé difatti as sum sidì vöi taca l'ätar.

Vuläva via anca quälca sguärd datsä e dadlà pr'ascuprì intension ad custi o cullä, sübit ien ciär i dü schierameint, e sürariss che un me visein l'era sà dré a fä 'l coint di milesim prima da decid da che part sedas. Mé sto chemò da dü ann, la banda ad pensiunä da sinquanta.

Ho sintì dill rob ca säva gnan chi gh'eran, la canäla c'la pérda ma sultant sa piöva da sbiess in April, la crapa in dal mür cla crësa ad dü milimetar ogni tri ann suta 'l ram d'una pianta, la mürela c'la g'ha un quarell ca sa sposta quand passa un camion (in via Guerzoni!), un ticc' d'un garäs un po' sbiadì e un macion d'érba c'anna völ mia savì da crëss pr'al vérs giüst. Am meravilì che 'l palassi al sia mia gnamò dat sù. Mè e l'ätar giuvnott as sum guardä in fassia e um pinsä la medesima roba : ma noi, fein adessa, in dua sum astä ad cà ? Pusibil che l'aministratur na sapia pösé che noi ? Par forza peins mé, lü al vegna agiurnä almenu con una telefonäda al dé e magäri anca da quälca visita a dumatici. I m'han anca sgridä parché mé sto all'ültim pian e gavriess d'avigh una vision cumpleta ad tütt, quälcuslëta anca di palassi a taca. **E si, parché mé g'ho ätar da fä che pasä la giurnä alla finëstra dal cëssu a guardä sù...e da part! As vëda sübit che un'ucasion atsè impurtanta l'è stä preparä con cüra maniacäla, sërva savì chi ha fatt cul lavor là ? Gh'é vöi cla g'ha un'agenda cun sò la storia dal cundumini e 'l disa fort e franch : cull'é l'um fatt seincu ann fa da lalü, l'é custä tot e l'ha finì in ott dé, in un teimp che un compiuter al sa sariss gnan pisä. Dò una smicciäda alla cuparteina, l'agenda l'é da milenövseintastantadü. E té sälva di fail in sla ciavëta.**

Gh'é l'espért ad preventiv, as pärla da varnisä una ringhiera ? Taaac. Pulì una canäla ? Taaac. Varnisä la mürela ? Taaac. Cambiä una pianta in dal giardein ? Taaac. Masä ill ciribigul cun la fionda seinsä sbrislä i vedar ? Taaac

La vutasion par decid di lavor straurdinäri l'é dürä un amen, i'ëran sà tütt d'acordi, second mé la prima cunvucasion la s'é consümä ad nött in canteina, a lüs smorsa, una candela in s'un tavlein, un föi ad cärta e una pëna par fä la cöinta di milesim, al mé Napoleon l'ha gnan pudì cumbat ätar che Uaterlo

Vöi l'ha mia vért bëcca, l'era impegnä a scriv tütt, i m'han ditt che sò muier la völ savì par fil e par segn' cusa s'é ditt. **Dalla minera c'la scriviva alla prossima riünion al sa preseinta cul registratur e no, al pudiva mia registrä cul telefon parché al g'ha un celülär ad chi ca manda via ancora i mesag' cun la fionda. Eccu chi völ masä 'l ciribigul!**



Pietro “Pedar” Rebecchi